

四庫全書

史部

欽定四庫全書

史部

金史卷六十三

詳校官國子監祭酒臣覺羅書善

內閣中書臣李彤覆勘

總校官舉人呂章維桓

校對官中書臣吳樹萱

謄錄監生臣龔履正

欽定四庫全書

金史卷六十三

元中書右丞相總裁托克托等修

列傳第一

后妃上

始祖明懿皇后

德帝思皇后

安帝節皇后

獻祖恭靖皇后

昭祖威順皇后

景祖昭肅皇后

世祖翼簡皇后

肅宗靖宣皇后

穆宗貞惠皇后

康宗敬僖皇后

太祖聖穆皇后

太祖光懿皇后

太祖欽憲皇后

太祖宣獻皇后

太祖崇妃蕭氏

太宗欽仁皇后

熙宗悼平皇后

海陵嫡母圖克坦氏

海陵母大氏

后圖克坦氏

諸嬖附

古者天子娶后三國來媵皆有娣姪凡十二女諸侯一

娶九女所以正嫡妾廣繼嗣息妬忌防淫慝塞禍亂也  
后亡則媵為繼室各以其叙無三媵則娣姪繼室亦各  
以其叙繼室者治其內政不敢正其位號禮廟無兩祔  
不並尊也魯成風始兩祔宋國三媵齊管氏三歸春秋  
皆譏之周禮內宰其屬則內小臣閹人寺人次之九嬪  
世婦女御女祝女史典婦功典絲典枲內司服又次之  
昏義稱后立六宮三夫人九嬪二十七世婦八十一御  
妻不與春秋周禮合後世因仍其說後宮遂至數千金

代后不娶庶族甥舅之家有周姬齊姜之義國初諸妃皆無位號熙宗始有貴妃賢妃德妃之號海陵淫嬖後宮寢多元妃妹妃惠妃貴妃賢妃宸妃麗妃淑妃德妃昭妃溫妃柔妃凡十二位大定後宮簡少明昌以後大備內宮制度諸妃視正一品比三夫人昭儀昭容昭媛修儀修容修媛充儀充容充媛視正二品比九嬪婕妤九人視正三品美人九人視正四品才人九人視正五品比二十七世婦寶林二十七人視正六品御女二十

七十視正七品采女二十七人視正八品比八十一御妻又有尚宮尚儀尚服尚食尚寢尚功皆內官也太祖嫡后聖穆生景宣光懿生宗幹有定策功欽憲有保佑之功故自熙宗時聖穆光懿欽憲皆祔宣獻生睿宗大定祔馬故太祖廟祔四后睿世顯宣皆祔兩后惟太宗景宣熙宗章宗室附一后貞慈光獻昭聖雖庶姓皆以子貴宣宗冊溫都氏乃賜姓變古甚矣故自初起至于國亡列其世次著其族里可考鑒焉其無與於世道者

置不錄

始祖明懿皇后完顏部人年六十餘嫁始祖天會十五年追謚

德帝思皇后不知何部人天會十五年追謚

安懿節皇后不知何部人天會十五年追謚

獻祖恭請皇后不知何部人天會十五年追謚

昭祖威順皇后圖克坦氏諱烏爾袞都喀哈勒琿水達魯鄉圖克坦部人其父巴圖達爾罕后性剛毅人莫敢



聘獻祖將為昭祖娶婦曰此子勇斷異常柔弱之女不可以為配乃為昭祖娶焉天會十五年追謚

景祖昭肅皇后唐古氏刷水鄂約村唐古部人諱圖卜新父蘇布特薩固察巫者也后有識度在父母家好待賓客父母出則多置酒饌享鄰里迨于行旅景祖飲食過人時人名之和鑾解在景祖紀昭祖曰儉嗇之女吝惜酒食不可以配烏古鼐聞后性度如是乃娶焉遼使通肯來伐五國佛寧部景祖使后與噶順為質於巴哩

美而與通肯襲取之遼主以景祖為節度使后雖喜賓客而自不飲酒景祖與客飲后專聽之翌日枚數其所為無一不中其縻肯有醉而喧呶者輒自歌以釋其忿爭軍中有被笞罰者每以酒食慰諭之景祖行部輒與偕行政事獄訟皆與決焉景祖沒後世祖兄弟凡用兵皆稟於后而後行勝負皆有懲勸農月親課耕耘刈穫遠則乘馬近則策杖勤於事者勉之晏出蚤休者訓勵之后往伊敦村世祖肅宗皆從會和諾克薩克達偕

來是時已有隙被酒語相侵舉刃相向后起兩執其手  
謂和諾克薩克達曰汝等皆吾夫時舊人奈何一旦遽  
忘吾夫之恩與小兒子輩忿爭乎因自作歌和諾克薩  
克達怒乃解其後和諾克兄弟起兵來攻肅宗再失利  
世祖已退烏春兵與和諾克戰于北隘甸部人碩碩歡  
逃歸袒甲而至告后曰軍敗矣后方憂懣會康宗來報  
捷后乃喜既而和諾克薩克達皆降后不妬忌闊略女  
工能輯睦宗族當時以為有丈夫之度云天會十五年

追謚

世祖翼簡皇后納喇氏大安九年癸酉歲卒天會十五年追謚

肅宗靖宣皇后富察氏太祖將舉兵入告于后后曰汝  
邦家之長見可則行吾老矣無貽我憂汝亦必不至是  
太祖奉觴為壽即奉后出門酌酒禱天后命太祖正坐  
號令諸將自是太祖每出師還輒率諸將上謁獻所俘  
獲天會十五年追謚

穆宗貞惠皇后烏庫哩氏天會十五年追諡

康宗敬僖皇后唐古氏天會十五年追諡

太祖聖穆皇后唐古氏天會十三年追諡仍贈后父羅  
索太尉榮國公祖達呼布司徒英國公曾祖哈納司空  
溫國公

太祖光懿皇后費摩氏天會十三年追諡

太祖欽憲皇后赫舍哩氏天會十三年尊為太皇太后  
宮號慶元十四年正月己巳朔熙宗朝于慶元宮然後

御乾元殿受羣臣賀是月丁丑崩于慶元宮二月癸卯  
祔葬睿陵

太祖宣獻皇后布薩氏睿宗母也天會十三年追冊曰  
德妃大定元年追諡

宗妃蕭氏熙宗時封貴妃天德二年正月封元妃是月  
尊封太妃海陵母大氏事蕭氏甚謹海陵篡立尊大氏  
為皇太后居永寧宮每有宴集太妃坐上坐大氏執婦  
禮海陵積不能平及殺宗義等誣太妃以隱惡殺之併

殺所生子任主威赫大定十九年詔改葬太宗正承宗  
安監護葬事遣使致祭上欲復太妃舊號下禮官議前  
代稱太妃者皆以子貴古者入稱后繫夫在朝稱太繫  
子與今蕭妃事不同恐不得稱太止當追封妃號詔從  
之乃封崇妃云

太宗欽仁皇后唐古氏熙宗即位與太祖欽憲皇后俱  
尊為太皇太后號明德宮贈后父阿爾遜太尉宋國公  
祖沙必司徒英國公曾祖阿喇蘇司空溫國公十四年

正月己巳朔上朝兩宮太后然後御乾元殿受賀自後  
歲以為常皇統元年上自燕京還京師朝謁于明德宮  
明年上如天開殿皇子生使使馳報太后太后至天開  
殿上與皇后親迎之二年崩于明德宮諡曰欽仁皇后  
祔葬恭陵

熙宗悼平皇后費摩氏熙宗即位封貴妃天眷元年立  
為皇后父呼達拜太尉贈曾祖舍音司空祖和碩司徒  
皇統元年熙宗受尊號冊為慈明恭孝順德皇后二年



太子濟安生是歲熙宗年二十四喜甚乃肆赦告天地  
宗廟彌月冊為皇太子未一歲薨熙宗在位宗翰宗幹  
宗弼相繼秉政帝臨朝端默雖初年國家多事而廟筭  
制勝齊國就廢宋人請臣吏清政簡百姓樂業宗弼既  
沒舊臣亦多物故后干預政事無所忌憚朝官往往因  
之以取宰相濟安薨後數年繼嗣不立后頗掣制熙宗  
熙宗內不能平因無聊縱酒酗怒手刃殺人左丞相亮  
生日上遣太興國以司馬光畫像玉吐鶻毼馬賜之后

亦附賜生日禮物熙宗聞之怒遂杖興國而奪回所賜  
海陵本懷覬覦因之疑畏愈甚蕭牆之變從此萌矣近  
侍高壽星隨例遷屯燕南入訴於后后激怒熙宗殺左  
司郎中薩哈杖平章政事秉德而壽星竟得不遷秉德  
唐古辯之姦謀起焉海陵乘之以成逆亂之計久之熙  
宗積怒遂殺后而納胙王常勝妃薩滿入宮繼又殺德  
妃烏庫哩氏妃瓜爾佳氏張氏費摩氏明日熙宗遇弒  
海陵已弒熙宗欲收人心以后死無罪降熙宗為東昏

王追謚后為悼皇后封后父呼達為王大定間復熙宗  
帝號加謚后為悼平皇后祔葬思陵

海陵嫡母圖克坦氏宗幹之正室也圖克坦無子次室  
李氏生長子鄭王充次室大氏生三子長即海陵也圖  
克坦賢遇下有恩大氏事之甚謹相得歡甚圖克坦養  
充為己子充與海陵俱為熙宗宰相充嗜酒圖克坦常  
責怒之尤愛海陵海陵以其母大氏與圖克坦嫡妾之  
分心常不安及弒熙宗圖克坦與太祖妃蕭氏相顧愕

然曰帝雖失道人臣豈可至此圖克坦入宮見海陵不  
曾賀海陵銜之天德二年正月圖克坦與大氏俱尊為  
皇太后圖克坦居東宮號永壽宮大氏居西宮號永寧  
宮太后父富德與大氏父俱贈太尉封王圖克坦太后  
生日酒酣大氏起為壽圖克坦方與坐客語大氏跪者  
久之海陵怒而出明日召諸公主宗婦與太后語者皆  
杖之大氏以為不可海陵曰今日之事豈能尚如前日  
邪自是嫌隙愈深四年海陵遷中都獨留圖克坦於上

京圖克坦常憂懼每中使至必易衣以俟命大氏在中  
都常思念圖克坦太后謂海陵曰永壽宮待吾母子甚  
厚慎毋相忘也十二月十四日圖克坦氏生日海陵使  
祕書監納哈塔椿年往上京上壽貞元元年大氏病篤  
恨不得一見臨終謂海陵曰汝以我之故不令永壽宮  
偕來中都我死必迎致之事永壽宮當如事我三年右  
丞相布薩思恭太宗正承哈布爾往上京奉遷山陵海  
陵因命永壽宮太后與俱來繼使平章政事蕭玉迎祭

祖宗梓宮於廣寧海陵謂王曰醫巫閭山多佳致祭奠  
禮畢可奏太后於山水佳處遊覽及至沙流河海陵迎  
謁梓宮遂謁見太后海陵命左右約杖二束自隨跪於  
太后前謝罪曰亮不孝久闕溫清願太后痛笞之不然  
且不安太后親扶起之叱約杖者使去太后曰今庶民  
有克家子立百金之產尚且愛之不忍笞我有子如此  
寧忍笞乎十月太后至中都海陵帥百官郊迎入居壽  
康宮是日海陵及後宮宰臣以下奉觴上壽極歡而罷

海陵侍太后于宮中外極恭順太后坐起自扶掖之常從輿輦徒行太后所御物或自執之見者以為至孝太后亦以為誠然及謀伐宋太后諫止之海陵心中益不悅每謁太后還必忿怒人不知其所以及至汴京太后居寧德宮太后使侍婢高福娘問海陵起居海陵幸之因使伺太后動靜凡太后動止事無大小福娘夫特默格教福娘增飾其言以告海陵及樞密使布薩思恭征契丹薩巴辭謁太后太后與思恭語久之大槩言國家

世居上京既徙中都又自中都至汴今又興兵涉江淮  
伐宋疲弊中國我嘗諫止之不見聽契丹事復如此奈  
何福娘以告海陵海陵意謂太后以充為子充四子皆  
成立恐思恭將兵在外太后或有異圖乃召點檢大懷  
忠翰林待制鄂倫尚衣局使華特默武庫直長實實使  
弑太后于寧德宮命護衛高福色埒富僧額以兵士四  
十人從且戒之曰汝等見太后但言有詔令太后跪受  
即擊殺之勿令艱苦太后同乳妹安圖多口必妄言當



令速死及指名太后左右數人皆令殺之太后方擣蒲  
大懷忠等至今太后跪受詔太后愕然方下跪華特默  
從後擊之仆而復起者再高福等縊殺之年五十三并  
殺安圖及郡君巴克織阿爾法徹辰乳母納蘇侍女阿  
蘇阿爾本寧德宮護衛溫特赫扎拉直長旺嘉努薩巴  
實達爾和碩等海陵命焚太后屍棄其骨於水并殺充  
之子塔納阿里布元努額布勒逃匿歸于世宗自軍中  
召思恭還殺之及殺阿蘇子孫薩巴二子和碩二子封

高福娘為鄆國夫人以特默格為澤州刺史海陵許福娘征南回以為妃賜銀二千兩勅戒特默格無酣酒歐福娘毆福娘必殺汝大定間謚圖克坦曰哀皇后自澤州械特默格福娘至中都誅之其後貶海陵為庶人宗幹去帝號復封遼王圖克坦降封遼王妃云

海陵母大氏天德二年正月與圖克坦俱尊為皇太后大氏居永寧宮曾祖暨嗣贈司空祖臣寶贈司徒父昊天贈太尉國公兄興國努贈開府儀同三司衛國公十

一月昊天進封為王三年正月十六日海陵生日宴宗室百官於武德殿大氏懼甚飲盡醉明日海陵使中使奏曰太后春秋高常日飲酒不過數杯昨見飲酒沉醉兒為天子固可樂若聖體不和則子心不安其樂安在至樂在心不在酒也及遷中都永壽宮獨留上京大氏常以為言貞元元年四月大氏有疾詔以錢十萬貫求方藥及病篤遺言海陵當善事永壽宮戊寅崩詔尚書省應隨朝官至五月一日方治事中都自四月十九日

為始禁樂一月外路自詔書到日後官司三日不治事  
禁樂一月聲鐘七晝夜貞元三年大祥海陵率後宮奠  
哭于敢宮海陵將遷山陵于大房山故大氏猶在敢宮  
也九月太祖太宗德宗梓宮至中都尊謚曰慈憲皇后  
海陵親行冊禮與德宗合葬于大房山升祔太廟大定  
七年降封海陵太妃削去皇后謚號及宗幹降帝號封  
遼王詔以圖克坦氏為妃而大氏與順妃李氏寧妃蕭  
氏文妃圖克坦氏並追降為遼王夫人云

廢帝海陵后圖克坦氏大師舍音女初為岐國妃天德二年封為惠妃九月立為皇后三年十一月二十一日后生日百僚稱賀於武德殿久之海陵後宮寢多后寵頗衰希得進見沈璋妻張氏嘗為光英保母耶律徹在北京與海陵游從海陵使璋妻及徹妻侯氏入宮侍后徹本名實訥負官錢二千六百餘萬海陵皆免之正隆六年海陵幸南京六月癸亥左丞相張浩率百官迎謁海陵備法駕乘玉輅與后及太子光英共載而入海陵

伐宋后與光英居守海陵遇雪圖們額哩頁殺光英于  
汴后至中都居于海陵母大氏故宮頃之世宗憐其無  
依詔歸父母家于上京歲賜錢二千貫奴婢皆給官廩  
大定十年卒

海陵為人善飾詐初為宰相妾媵不過三數人及踐大  
位逞欲無厭後宮諸妃十二位又有昭儀至充媛九位  
嬈好美人才人三位殿直最下他不可舉數初即位封  
岐國妃圖克坦氏為惠妃後為皇后第二娘子大氏封

貴妃第三娘子蕭氏封昭容耶律氏封修容其後貴妃  
大氏進封惠妃貞元元年進封姝妃正隆二年進封元  
妃昭容蕭氏天德二年特封淑妃貞元二年進封宸妃  
修容耶律氏天德四年進昭媛貞元元年進昭儀三年  
進封麗妃即位之初後宮止此三人尊卑之叙等威之  
辨若有可觀者及其侈心既萌淫肆蠱惑不可復振矣  
昭妃阿里庫姓富察氏駙馬都尉穆里延女初嫁宗磐  
子阿古岱阿古岱誅再嫁宗室囊嘉特囊嘉特死是時

囊嘉特父托克索為元帥都監海陵從梁王宗弼俱在  
南京欲取阿里庫托克索不從遂止及篡位方三日詔  
遣阿里庫歸父母家閱兩月以婚禮納之數月特封賢  
妃再封昭妃阿里庫嗜酒海陵責讓之不聽由是寵衰  
昭妃初嫁阿古岱生女重節海陵與重節亂阿里庫怒  
重節批其頰頗有詆訾之言海陵聞之愈不悅阿里庫  
以衣服遺前夫子海陵將殺之圖克坦后率諸妃嬪求  
哀乃得免凡諸妃位皆以侍女服男子衣冠號假廝兒



有勝格者阿里庫與之同臥起如夫婦厨婢三娘以告  
海陵海陵不以為過惟戒阿里庫勿筮三娘阿里庫  
榜殺之海陵聞昭妃閣有死者意度是三娘曰若果爾  
吾必殺阿里庫問之果然是月光英生月海陵私忌不  
行戮阿里庫聞海陵將殺之也即不食日焚香禱祝冀  
脫死逾月阿里庫已委頓不知所為海陵使人縊殺之  
併殺侍婢擊三娘者

貴妃定格姓唐古氏有容色崇義節度使烏達之妻海

陵舊嘗有私侍婢貴格與知之烏達在鎮每遇元會生  
辰使家奴葛魯葛溫詣闕上壽定格亦使貴格候問海  
陵及兩宮太后起居海陵因貴格傳語定格曰自古天  
子亦有兩后者能殺汝夫以從我乎貴格歸具以海陵  
言告定格定格曰少時醜惡事已可恥今兒女已成立  
豈可為此海陵聞之使謂定格汝不忍殺汝夫我將族  
滅汝家定格大恐乃以子烏達布為辭曰彼常侍其父  
不得使海陵即召烏達布為符寶祇候定格曰事不可

止矣因烏達醉酒令葛溫葛魯縊殺烏達天德四年七月也海陵聞烏達死詐為哀傷已葬烏達即納定格宮中為娘子貞元元年封為貴妃大愛幸許以為后每同輦遊瑤池諸妃步從之海陵嬖寵愈多定格希得見一日獨居樓上海陵與他妃同輦從樓下過定格望見號呼求去詛罵海陵海陵陽為不聞而去定格自其夫時與家奴閭乞兒通嘗以衣服遺乞兒及為貴妃乞兒以妃家舊人給事本位定格既怨海陵疎已欲復與乞兒

通有比丘尼三人出入宮中定格使比丘尼向乞兒索  
所遺衣服以調之乞兒識其意笑曰妃今日富貴忘我  
耶定格欲以計納乞兒宮中恐閹者索之乃令侍兒以  
大篋盛褰衣其中遣人載之入宮閹者索之見篋中皆  
褰衣固已悔懼定格使人詰責閹者曰我天子妃親體  
之衣爾故翫視何也我且奏之閹者惶恐曰死罪請後  
不敢定格乃使人以篋盛乞兒載入宮中閹者果不敢  
復索乞兒入宮十餘日使衣婦人衣離諸宮婢抵暮遣

出貴格以告海陵定格縊死乞兒及比丘尼三人皆伏誅封貴格革國夫人初海陵既使定格殺其夫烏達使實達爾藥師帑傳旨定格告以納之之意藥師努知定格與乞兒有姦定格以奴婢十八口賂藥師努使無言與乞兒私事定格敗杖藥師努百五十初藥師努嘗盜玉帶當死海陵釋其罪逐去及遷中都復召為實達爾及藥師努既以匿定格姦事被杖後與祕書監文俱與靈壽縣主有姦文杖二百除名藥師努當斬海陵欲杖

之謂近臣曰藥師努於朕有功再杖之即死矣丞相李  
賄等執奏藥師努於法不可恕遂伏誅海陵以葛溫葛  
魯為護衛葛溫累官長安縣令葛魯累官襄城縣令大  
定初皆除名

麗妃實格者定格之妹祕書監文之妻也海陵私之欲  
納宮中乃使文庶母阿都固主文家海陵謂阿都固曰  
必出而婦不然我將別有所行阿都固以語文文難之  
阿都固曰上謂別有所行是欲殺汝也豈以一妻殺其

身乎文不得已與實格相持慟哭而訣是時海陵遷都至中京遣實格至中都俱納之海陵召文至便殿使實格穢談戲文以為笑定格死遣實格出宮不數日復召入封為修容貞元三年進昭儀正隆元年進封柔妃二年進麗妃

柔妃密呼姓耶律氏天德二年使禮部侍郎蕭拱取之于汴過燕京拱父仲恭為燕京留守見密呼身形非若處女者歎曰上必以疑殺拱矣及入宮果非處女明日

遣出宮海陵心疑蕭拱竟致之死密呼出宮數月復召入封為充媛封其母張氏莘國夫人伯母蘭陵郡君蕭氏為輦國夫人蕭拱妻色特爾密呼女兄也海陵既奪文妻實格却以色特爾妻文既而詭以密呼之召召色特爾入宮亂之其後密呼進封柔妃云

昭妃阿蘭海陵叔曹國王宗敏妻也海陵殺宗敏而納阿蘭宮中貞元元年封為昭妃大臣奏宗敏屬近尊行不可乃令出宮修儀高氏秉德弟嘉哩妻也海陵殺諸



宗室釋其婦女宗本子薩爾拉妻宗固子呼喇勒妻和色哩妻及嘉哩妻皆欲納之宮中諷宰相奏請行之使圖克坦貞諷蕭裕曰朕嗣續未廣此黨人婦女有朕中外親將納之何如裕曰近殺宗室中外異議紛紜奈何復為此邪海陵曰吾固知裕不肯從乃使貞自以已意諷裕必欲裕等請其事貞謂裕曰上意已有所屬公固止之將成疾矣裕曰必不肯已唯上擇焉貞曰必欲公等白之裕不得已乃具奏遂納之未幾封高氏為修儀

如其父高伊囉幹輔國上將軍母完顏氏封密國夫人  
高氏以家事訴於海陵海陵自熙宗時見悼后干政心  
惡之故自即位不使母后得預政事於是遣高氏還父  
母家詔尚書省凡后妃有請于宰相者收其使以聞  
昭媛扎巴姓耶律氏嘗許嫁奚人蕭唐古特海陵納之  
封為昭媛唐古特為護衛扎巴使侍女錫納以軟金鶴  
鶉袋數枚遺之事覺是時唐古特謁告在河間驛召問  
之唐古特以實對海陵釋其罪海陵登寶昌門樓以扎

巴徇諸后妃手刃擊之墮門下死并誅侍女錫納

壽寧縣主寶庫宋王宗望女也靜樂縣主布拉及錫納  
梁王宗弼女也寶古爾宗雋女也皆從姊妹混同郡君  
蘇呼和卓及其妹伊都太傳宗本女也再從姊妹郎國  
夫人重節宗磐女孫再從兄之女及母大氏表兄張定  
安妻鼐喇古麗妃妹富魯和卓皆有夫唯寶庫喪夫海  
陵無所忌恥使高寶古訥格阿古等傳達言語皆與之  
私凡妃主宗婦嘗私之者皆分屬諸妃出入位下鼐喇

古出入元妃位富魯和卓出入麗妃位蘇圻和卓伊都  
出入貴妃位寶庫重節出入昭妃位布拉寶古爾出入  
淑妃位海陵使訥格召寶庫先於暖位小殿置琴阮其  
中然後召之寶庫已色衰常譏其衰老以為笑唯錫納  
蘇呼和卓最寵恃勢咎決其夫海陵使錫納夫素赫押  
護衛直宿蘇呼和卓夫蘇色近侍局直宿謂蘇色曰爾  
妻年少遇爾直宿不可令宿於家常令宿於妃位每召  
入必親伺候廊下立久則坐於高寶古膝上高寶古曰

天子何勞苦如此海陵曰我固以天子為易得耳此等  
期會難得乃可貴也每於臥內徧設地衣俛逐以為戲  
蘇呼和卓在外為淫佚海陵聞之大怒謂蘇呼和卓曰  
爾愛貴官有貴如天子者乎爾愛人才有才兼文武似  
我者乎爾愛娛樂有豐富偉岸過於我者乎怒甚氣咽  
不能言少頃乃撫慰之曰無謂我聞知便爾慚惡遇燕  
會當行立自如無為衆所測度也恐致非笑後亦屢召  
入焉伊都牌印僧古埒妻也海陵嘗曰伊都貌雖不揚

而肌膚潔白可愛布拉進封壽康公主寶庫進封昭寧公主蘇呼和卓進封壽陽縣主重節進封蓬萊縣主重節即昭妃富察氏所生富察怒重節與海陵淫批其頰海陵怒富察氏終殺之者也

凡宮人在外有夫者皆分番出入海陵欲率意幸之盡遣其夫往子京婦人皆不聽出外常令教坊番直禁中每幸婦人必使奏樂撤其幃帳或使人說淫穢語於其前嘗幸室女不得遂使元妃以手左右之或妃嬪列坐

輒率意淫亂使共觀或令人效其形狀以為笑凡坐中  
有嬪御海陵必自擲一物於地使近侍環視之他視者  
殺誠宮中給便男子於妃嬪位舉首者刖其目出入不  
得獨行便旋須四人偕往所司執刀監護不由路者斬  
之日入後下階砌行者死告者賞錢二百萬男女倉卒  
誤相觸先聲言者賞三品官後言者死齊言者皆釋之  
女使闢拉有夫在外海陵封以縣君欲幸之惡其有娠  
飲以麝香水躬自搯拉其腹欲墮其胎闢拉乞哀欲全

性命苟得乳免當不舉海陵不顧竟墮其胎富察阿古  
岱女徹辰海陵姊慶宜公主所生嫁秉德之弟圖哩秉  
德誅當連坐太后使梧桐請于海陵由是得免海陵白  
太后欲納徹辰太后曰是兒始生先帝親抱至吾家養  
之至于成人帝雖舅猶父也不可其後嫁宗室安塔哈  
之子伊里布海陵數使人諷伊里布出之因而納之徹  
辰與完顏守誠有姦守誠本名格呼勒事覺海陵殺守  
誠太后為徹辰求哀乃釋之徹辰家奴告徹辰語涉不



道海陵自臨問責徹辰曰汝以守誠死詈我邪遂殺之  
同判大宗正阿古爾妻富僧額元妃之妹因入見元妃  
海陵逼淫之富僧額自是不復入宮世宗為濟南尹海  
陵召夫人烏凌阿氏夫人謂世宗曰我不行上必殺王  
我當自勉不以相累也夫人行至良鄉自殺是以世宗  
在位二十九年不復立后焉

金史卷六十三

欽定四庫全書

金史卷六十四

元中書右丞相總裁托克托等修

列傳第二

后妃下

睿宗欽慈皇后

睿宗貞懿皇后

世宗昭德皇后

世宗元妃張氏

世宗元妃李氏

顯宗孝懿皇后

顯宗昭聖皇后

章宗欽懷皇后

章宗元妃李氏

衛紹王后圖克坦氏

宣宗皇后王氏

宣宗明惠皇后

哀宗皇后圖克坦氏

睿宗欽慈皇后富察氏睿宗元配后之母太祖之妹也  
睿宗為左副元帥天會十三年薨追封潞王后封潞王  
妃皇統六年進號冀國王妃天德間進國號正隆例親  
王止封一字王睿宗封許王后封許王妃世宗即位睿

宗升祔追謚欽慈皇后贈后曾祖薩布司空韓國公祖  
布拉司徒鄭國公父阿巴太尉曹國公大定二年祔墓  
景陵世宗嘗曰今之女直不比前輩雖親戚世叙亦不  
能知其詳太后之母太祖之妹人亦不能知也謂宗叙  
曰亦是卿父譚王之妹知之乎宗叙曰臣不能知也上  
曰父之妹且不知其如疎遠何十九年后族人勸農使  
索羅請致仕宰相以索羅未嘗得歷外任請除一外官  
以均勞佚上曰索羅不開政事不可使之治民雖太后

戚屬富貴之可也不聽

貞懿皇后李氏世宗母遼陽人父綽爾齊仕遼官至桂州觀察使天輔間選東京士族女子有姿德者赴上京后入睿宗邸七年世宗生天會十三年睿宗薨世宗時年十三后教之有義方嘗密謂所親曰吾兒有奇相貴不可言居上京內治謹嚴臧獲皆守規矩衣服飲食器皿無不精潔敦睦親族周給貧乏宗室中甚敬之后性明敏剛正有決容貌端整言不妄發舊俗婦女寡居宗

族接續之后乃祝髮為比丘尼號通慧圓明大師賜紫衣歸遼陽營建清安禪寺別為尼院居之貞元三年世宗為東京留守正隆六年五月后卒世宗哀毀過禮以喪去官未幾起復為留守是歲十月后弟李石定策世宗即位于東京尊謚為貞懿皇后其寢園曰孝寧宮大定二年改葬睿宗於景陵初后自建浮圖于遼陽是為垂慶寺臨終謂世宗曰鄉土之念人情所同吾已用浮屠法置塔于此不必合葬也我死毋忘此言世宗深念

遺命乃即東京清安寺建神御殿詔有司增大舊塔起  
奉慈殿於塔前勅禮部尚書王競為塔銘以叙其意贈  
后曾祖桑戩司空潞國公祖波司徒衛國公父綽爾齊  
太尉隋國公四年封后妹為邢國夫人賜銀千兩錦綺  
二十端絹五百匹九年神御殿名曰報德殿詔翰林學  
士張景仁作清安寺碑其文不稱旨詔左丞石琚共修  
之十三年東京垂慶寺起神御殿寺地褊狹詔買傍近  
民地優與其直不願鬻者以官地易之二十四年世宗



至東京幸清安垂慶寺

世宗昭德皇后烏陵阿氏其先居於海倫河世為烏陵  
阿部長率部族來歸居上京與本朝為婚姻家曾祖雙  
寬康宗時累使高麗父實德瑄騎射絕倫從太祖伐遼  
領行軍明安雖在行伍間不嗜殺人以功授世襲穆昆  
為東京留守后聰敏孝慈容儀整肅在父母家宗族皆  
敬重之既歸世宗事舅姑孝謹治家有敘甚得婦道睿  
宗伐宋得白玉帶蓋帝王之服御也睿宗沒後世宗寶

畜之后謂世宗曰此非王邸所宜有也當獻之天子世宗以為然獻之熙宗於是悼后大喜熙宗晚年頗酗酒獨於世宗無間然海陵篡立深忌宗室烏達諧秉德以為意在葛王秉德誅后勸世宗多獻珍異以說其心如故遼果勒圖犀佩刀吐鵬良玉茶器之類皆奇寶也海陵以世宗恭順畏已由是忌刻之心頗解后不忘妬為世宗擇後房廣繼嗣雖顯宗生後而此心不移后嘗有疾世宗為視醫藥數日不離去后曰大王視妾過厚其

知者以為視疾不知者必有專妬之嫌又曰婦道以正  
家為大第恐德薄無補內治安能効嬪妾所為惟欲已  
厚也世宗在濟南海陵召后來中都后念若身死濟南  
海陵必殺世宗惟奉詔去濟南而死世宗何以免謂世  
宗曰我當自勉不可累大王也召王府臣僕張謹言諭  
之曰汝王之腹心人也為我禱諸東獄我不負王使皇  
天后土明鑒我心召家人謂之曰我自初年為婦以至  
今日未嘗見王有違道之事今宗室往往被疑者皆奴

僕不良傲恨其主以誣陷之耳汝等皆先國王時舊人當念舊恩無或妄圖也違此言者我死復於冥中觀汝所為衆皆泣下后既離濟南從行者知后必不肯見海陵將自為之所防護甚謹行至良鄉去中都七十里從行者防之稍緩后得間即自殺海陵猶疑世宗教之使然世宗自濟南改西京留守過良鄉使魯國公主葵后于宛平縣土魯原大定二年追冊為昭德皇后立別廟贈三代曾祖雙寬司空徐國公曾祖母完顏氏徐國夫

人祖珠蘇庫司徒代國公祖母完顏氏代國夫人父實德琿太尉瀋國公母完顏氏瀋國夫人勅有司改葬命皇太子致奠以后兄暉子天錫為太尉實德琿後授世襲明安上謂天錫曰朕四五歲時與皇后定婚乃祖太尉置朕于膝上曰吾婿七人此婿最幼後來必大吾門今卜葬有期疇昔之言驗矣六年利涉軍節度副使烏凌阿楚呼捕逃軍受賕當死有司奏楚呼后大功親當議詔論如法八年七月章宗生世宗喜甚謂顯宗曰得

社稷冢嗣朕樂何極此皇后貽爾以陰德也十年十月  
將改葬太尉實德瑄有司奏禮儀援唐葬太尉李良器  
司徒馬燧故事百官便服送至都門外五里上曰前改  
葬太后父母未嘗用此故事但以本朝禮改葬之惟親  
戚皆送詔皇太子臨奠十一年皇太子生日世宗宴於  
東宮酒酣命豫國公主起舞上流涕曰此女之母皇后  
婦道至矣朕所以不立中宮者念皇后之德今無其比  
故也十二年四月立皇后別廟于太廟東北隅是歲五

月車駕幸土魯原致奠十九年改卜于大房山十一月  
甲寅皇后梓宮至近郊百官奉迎乙卯車駕如楊村致  
祭丙辰上登車送哭之痛戊午奉安于磐寧宮庚申葬  
于坤厚陵諸妃祔焉二十九年祔葬興陵章宗時有司  
奏太祖謚有昭德字改謚明德皇后

元妃張氏父玄微母高氏興世宗母貞懿皇后葭蓂親  
世宗納為次室生趙王永中而張氏卒大定二年追封  
宸妃是歲十月追進惠妃十九年追進元妃大定二十

五年皇太子薨永中行次最長而世宗與圖克坦克寧  
議立章宗為太孫世宗嘗曰克寧與永中有親而建議  
立太孫真社稷臣也尚書右丞汝弼者玄微子永中母  
舅汝弼妻高托噶屢以邪言怵永中畫元妃像朝夕事  
之觀望徼福及挾左道明昌二年高托噶誅死事連汝  
弼及永中汝弼以死後事覺得不追削官爵而章宗心  
疑永中累年不釋諫官賈守謙路鐸上疏欲寬解上意  
章宗愈不悅平章政事完顏守貞持其事不肯決章宗



怒守貞罷知濟南府諸諫官皆斥外賜永中死金代外戚之禍惟張氏云

元妃李氏南陽郡王李石女生鄭王永蹈衛紹王永濟潞王永德豫王永成母昭儀梁氏早卒上命永成為妃養子大定元年封賢妃二妃進封貴妃七年進封元妃世宗即位感念昭德皇后不復立后嘗曰朕所以不復立后者今後宮無皇后之賢故也元妃下皇后一等在諸妃上石有定策功世宗厚賞而深制之寵以尚書令

之位而責成左右丞相以下妃雖貴不得預政宮壺無事大定二十一年二月上如春水次長春宮戊子妃以疾薨詔永成永蹈永濟永德皆服衰經居喪己丑皇太子及扈從臣僚奉慰于芳明殿辛卯留守官平章政事唐古安禮曹王永功等上表奉慰御史中丞張九思提控殯事少府監左光慶大興少尹王脩典領鹵簿儀仗宮籍監別治殯所還殯京師乙未入自崇智門百官郊迎親戚迎奠道路殯于興德宮西位別室庚子上至京

師幸興德宮致奠比葬三致奠焉詔平章政事烏庫哩  
元忠監護葬事癸未啓畿上輟朝皇太子親王宗戚百  
官送葬甲申葬於海王莊丙戌上如海王莊燒飯二十  
八年九月與賢妃舒穆魯氏德妃圖克坦氏柔妃大氏  
俱陪葬于坤厚陵衛紹王即位追謚光獻皇后贈妃弟  
獻可特進貞祐三年九月削皇后號

顯宗孝懿皇后圖克坦氏其先德里必喇人曾祖綽從  
太祖取遼有功命以所部為明安世襲之祖博勒和以

戰功多累官開府儀同三司贈司徒齊國公父貞尚遼  
王宗幹女梁國公主加駙馬都尉贈太師廣平郡王后  
以皇統七年生於遼陽母夢神人授以寶珠光燄滿室  
既寤而生紅光燭于庭后性莊重寡言父母嘗令總家  
事細大畢辦諸男不及也世宗初即位貞為御史大夫  
自南京馳見世宗喜謂之曰卿雖廢主腹心臣然未嘗  
助彼為虐况卿家法可尚其以卿女為朕子妃及顯宗  
為皇太子大定四年九月備禮親迎於貞第世宗臨宴

盡歡而罷是年十一月顯宗生辰初封為皇太子妃八年七月上遣宣徽使伊喇錫勒塔干以名馬寶刀御膳賜太子及妃諭之曰妃今臨蓐願平安得雄有慶之後宜以此刀寘左右既而皇孫生是為章宗時上幸金蓮川次永井翌日上臨幸撫視宴甚歡又賜御服佩刀等物謂顯宗曰祖宗積慶且皇后陰德至厚而有今日社稷之洪福也又謂李石赫舍哩志寧曰朕諸子雖多皇后止有太子一人而已今幸得嫡孫觀其骨相不凡又

生瑪達格山山勢衍氣清朕甚嘉之因以山名為章宗  
小字后素謙謹每畏其家世崇寵見父母流涕而言曰  
高明之家古人所忌願善自保持其後家果以海陵事  
敗益其遠慮如此世宗嘗謂諸王妃公主曰皇太子妃  
容止合度服飾得中爾等當法效之章宗即位尊為皇  
太后更所居仁壽宮名曰隆慶宮詔有司歲奉金千兩  
銀五千兩重幣五百端絹二千匹綿二萬兩布五百匹  
錢五萬貫他所應用內庫奏之母拘其數上月或五朝

六朝而後愈加敬儉見諸大長主公禮如平時敦睦九族恩紀皆洽尤惡聞人過諛佞之言無所得入起以容物未嘗見喜愠然御下公平雖至親無所阿徇嘗誡諸姪曰皇帝以我故乃推恩外家當盡忠圖報勿謂小善為無益而弗為小惡為無傷而弗去毋藉吾之貴輒肆非違以干國家常憲一日妹并國夫人嫂涇國夫人等侍側因諭之曰爾家累素重且非豐厚宜節約財用勿以吾為可恃吾受天下之養豈有所私積哉况財用者

天下之財用也吾終不能多取以富爾之私室家人有以玉盃進者却之且曰貴異物而殫財用非我所欲也况我之賜予有度今爾以此為獻何以自給徒費汝財我實無用後勿復爾明昌元年禮官議以五月奉上冊寶后弗許上屢為之請后曰今世宗服未終遽衣錦繡佩珠玉於禮何安當俟服闋行之上諭有司曰太后執意甚堅其待來年明昌二年正月崩於隆慶宮年四十五謚曰孝懿祔葬裕陵后好詩書尤喜老莊學純淡清



懿造次必於禮逮嬪御以和平其生子有而母亡者視之如已所生慈訓無間上時問安見事有未當者必加之嚴誠云

昭聖皇后劉氏遼陽人天眷二年九月己亥夜后家若見有黃衣女子入其母室中者俄頃后生性聰慧凡字過目不忘初讀孝經旬日終卷最喜佛經世宗為東京留守因擊毬見而奇之使見貞懿皇后于府中進退閑雅無恣睢之色大定元年選入東宮時年二十三三年

三月十三日宣宗生是日大雨震電后驚悸得疾尋卒  
承安五年贈裕陵昭華宣宗即位追尊為皇太后升祔  
顯宗廟追謚昭聖皇后

章宗欽懷皇后富察氏上京路和碩河人曾祖特克紳  
國初有功累階光祿大夫贈司空應國公祖阿古岱官  
至特進贈司徒譙國公父鼎壽尚熙宗鄭國公主授駙  
馬都尉中都路溫圖瑄山明安和碩穆丹世襲穆昆累  
官至金吾衛上將軍贈太尉越國公后之始生有紅光

被體移時不退就養於姨冀國公主既長孝謹如事所  
生大定二十三年章宗為金源郡王行納采禮世宗遣  
近侍局使圖克坦懷忠賜金百兩銀千兩廐馬六匹重  
綵三十端拜命間慶雲見于日側觀者異之是年十一  
月備禮親迎詔親王宰執三品已上官及命婦會禮封  
金源郡王夫人後進封妃崩后性淑明風儀粹穆知讀  
書為文帝即位遂加追冊仍詔告中外奉安神主于坤  
寧宮歲時致祭大安祔葬于道陵

元妃李氏師兒其家有罪沒入宮籍監父湘母王盼兒  
皆微賤大定末以監戶女子入宮是時宮教張建教宮  
中師兒與諸宮女皆從之學故事宮教以青紗隔障蔽  
內外宮教居障外諸宮女居障內不得面見有不識字  
及問義皆自障內映紗指字請問宮教自障外口說教  
之諸女子中惟師兒易為領解建不知其誰但識其音  
聲清亮章宗嘗問建宮教中女子誰可教者建對曰就  
中聲音清亮者最可教章宗以建言求得之宦者梁道

譽師兒才美勸章宗納之章宗好文辭妃性慧黠能作  
字知文義尤善伺候顏色迎合旨意遂大愛幸明昌四  
年封為昭容明年進封淑妃父湘追贈金紫光祿大夫  
上柱國隴西郡公祖父曾祖父皆追贈兄喜兒舊嘗為  
盜與弟鋈格皆擢顯近勢傾朝廷風采動四方射利競  
進之徒爭趨走其門南京李炳中山李著與通譜系超  
取顯美胥持國附依以致宰相怙財固位上下紛然知  
其姦蠹不敢擊之雖擊之莫能去也赫舍哩執中貪悞

不法章宗知其跋扈而屢斥屢起終亂天下自欽懷皇  
后崩中宮虛位久章宗意屬李氏而國朝故事皆圖克  
坦唐古富察納喇布薩赫舍哩烏凌阿烏庫哩諸部  
部長之家世為姻婚娶后尚主而李氏微甚至於章宗果  
欲立之大臣固執不從臺諫以為言帝不得已進封為  
元妃而勢位熏赫與皇后侔矣一日章宗宴宮中優人  
瑋瑁頭者戲于前或問上國有何符瑞優曰汝不聞鳳  
皇見乎其人曰知之而未聞其詳優曰其飛有四所應

亦異若嚮上飛則風雨順時嚮下飛則五穀豐登嚮外  
飛則四國來朝嚮裡飛則加官進祿上笑而罷欽懷后  
及妃姬嘗有子或二三歲或數月輒夭承安五年帝以  
繼嗣未立禱祀太廟山陵少府監張汝猷因轉對奏皇  
嗣未立乞聖主親行祀事之後遣近臣詣諸岳觀廟祈  
禱詔司空襄往亳州禱太清宮既而止之遣刑部員外  
郎完顏匡往焉泰和二年八月丁酉元妃生皇子德里  
羣臣上表稱賀宴五品以上于神龍殿六品以下宴于

東廡詔平章政事圖九坦鑑報謝太廟右丞完顏匡報  
謝山陵使使亳州報謝太清宮既彌月詔賜名封為葛  
王葛王世宗初封大定後不以封臣下由是三等國號  
無葛尚書省奏請於瀛王下附葛國號上從之十二月  
癸酉德里生滿三月勅放僧道度牒三千道設醮于玄  
真觀為德里祈福丁丑御慶和殿浴皇子詔百官用元  
旦禮賀進酒稱賀五品以上進禮物生凡二歲而薨兄  
喜兒累官宣徽使安國軍節度使弟特爾格累官近侍



局使少府監泰和八年承御賈氏及范氏皆有娠未及乳月章宗已得嗽疾頗困是時衛王永濟自武定軍來朝章宗於父兄中最愛衛王欲使繼體立之語在衛紹王紀衛王朝辭是日章宗力疾與之擊毬謂衛王曰叔王不欲作主人遽欲去邪元妃在傍謂帝曰此非輕言者十一月乙卯章宗大漸衛王未發元妃與黃門李新喜議立衛王使內侍滿守恒召之守恒頗知書識大體謂元妃曰此大事當與大臣議迺使守恒召平章政事

完顏匡匡顯宗侍讀最為舊臣有征伐功故獨召之匡  
至遂與定策立衛王丙辰章宗崩遺詔皇叔衛王即皇  
帝位詔曰朕之內人見有娠者兩位如其中有男當立  
為儲貳如皆是男子擇可立者立之衛紹王即位大安  
元年二月詔曰章宗皇帝以天下重器畀于眇躬遺旨  
謂掖庭內人有娠者兩位如得男則立為儲貳申諭多  
方皎如天日朕雖涼菲實受付託思克副於遺意每曲  
為之盡心擇靜舍以俾居遣懿親而守視欽懷皇后母

鄭國公主及乳母蕭國夫人晝夜不離昨聞有爽於安  
養已用軫憂而弗寧爰命大臣專為調護今者平章政  
事布薩端左丞孫即康奏言承御賈氏當以十一月免  
乳今則已出三月來事未可度知范氏產期合在正月  
而太醫副使儀師顏言自年前十一月診得范氏胎氣  
有損調治迄今脉息雖和胎形已失及范氏自願於神  
御前削髮為尼重念先皇帝重屬大事豈期聞此深用  
怛然今范氏既已有損而賈氏猶或可冀告於先帝願

降靈禧默賜保全早生聖嗣尚恐衆庶未究端由要不  
匿於播敷使咸明於吾意四月詔曰近者有訴元妃李  
氏潛計負恩自泰和七年正月章宗暫嘗違豫李氏與  
新禧竊議為儲嗣未立欲令宮人詐作有身計取他兒  
詐充皇嗣遂於年前閏月十日因賈承御病嘔吐腹中  
若有積塊李氏與其母王盼兒及李新禧謀令賈氏詐  
稱有身俟將臨月於李家取兒以入月日不偶則規別  
取以為皇嗣章宗崩謀不及行當先帝彌留之際命平

章政事完顏匡都提點中外事務明有勅旨我有兩宮  
人有娠更令召平章左右並聞斯語李氏并新喜乃敢  
不依勅旨喚喜兒特爾格事既不克竊呼提點近侍局  
烏庫哩慶壽與計因品藻諸王議復不定知近侍局副  
使圖克坦扎克繼遣人召平章已到宣華門外始發勘  
同平章入內一遵遺旨以定大事方先帝疾危數召李  
氏李氏承召不到及索衣服亦不即來猶與其母私議  
先皇平昔或有幸御李氏嫉妬令女巫李定奴作紙木

人驚驚符以事魘魅致絕聖嗣所為不軌莫可殫陳事  
既發露遣大臣按問俱已款服命宰臣往審亦如之有  
司議法當極刑以其久侍先帝欲免其死王公百僚執  
奏堅確今賜李氏自盡王盼兒李新喜各正典刑李氏  
兄安國軍節度使喜兄弟少府監特爾格如律追除復  
係監籍於遠地安置諸連坐並依律令施行承御賈氏  
亦賜自盡蓋章宗崩三日而稱范氏胎氣有損章宗疾  
彌留亦無完顏匡都提點中外事務勅旨或謂完顏匡

欲專定策功構致如此自後天下不復稱元妃但呼曰  
李師兒及呼沙呼弑衛王立宣宗請貶降衛王降為東  
海郡侯其詔曰大安之初頒諭天下謂李氏與其母王  
盼兒及李新喜同謀令賈氏虛稱有身各正罪法朕惟  
章宗皇帝聖德聰明豈容有此欺給近因集議武衛軍  
副使兼提點近侍局完顏達霍王傳太政德皆言賈氏  
事內有寃此時達職在近侍政德護賈氏所以知之朕  
親臨問左證其事曖昧據當時被罪貶責者可俱令放

免還家由是李氏家族皆得還

衛紹王后圖克坦氏大安元年立為皇后至寧元年呼沙呼亂與衛王俱還衛邸帝遇弑宣宗即位衛王降為東海郡侯圖克坦氏削后號貞祐二年遷都汴詔凡衛紹王及部屬王家人皆徙鄭州仍禁錮不得出入男女不得婚嫁者十九年天興元年詔釋禁錮是時河南已不能守子孫不知所終

宣宗皇后王氏中都人明惠皇后妹也其父微時嘗夢



二玉梳化為月已而生二后及沒有芝生于樞初宣宗  
封翼王章宗詔諸王求民家子以廣繼嗣是時后與龐  
氏偕入王邸及見后姊有姿色又納之貞祐元年九月  
封后為元妃姊為淑妃龐氏為真妃淑妃生哀宗真妃  
生守純后無子養哀宗為己子貞祐二年七月賜姓溫  
都氏立為皇后追封后曾祖母得壽司空冀國公曾祖母  
劉氏冀國夫人祖璞司徒益國公祖母楊氏益國夫人  
父彥昌太尉汴國公母馮氏汴國夫人三年莊獻太子

薨哀宗為皇太子宣宗崩哀宗即位正大元年尊后為皇太后號其宮曰仁聖進封后父曰南陽郡王或曰宣宗為諸王時莊獻太子母為正妃及即位尊為皇后貞祐元年九月詔曰元妃某氏久奉侍於潛藩已賜封於國號可立為皇后其名氏蓋不可考也或又曰自王氏姊妹入宮而后寵衰尋為尼王氏遂立為后皆后妯娌惠之謀也初王氏姊妹受封之日大風昏霾黃氣充塞天地已而后夢丐者數萬踵其後心甚惡之占者曰后

者天下之母也百姓貧窶將誰訴焉后遂勅有司京城設粥與冰藥及壬辰癸巳歲河南饑饉大元兵圍汴加以大疫汴城之民死者百餘萬后皆目覩焉哀宗釋服將禘饗太廟先期有司奏冕服上請仁聖慈成聖兩宮太后御內殿因試衣之以見兩宮大悅上更便服奉觴為兩宮壽仁聖太后諭上曰祖宗初取天下甚不易何時使四方承平百姓安樂天子服此法服於中都祖廟行禘饗乎上曰阿婆有此意臣亦何嘗忘慈聖太后亦

曰恒存此心見此當有期矣遂酌酒上壽歡然而罷天  
興元年冬哀宗遷歸德二年正月遣近侍圖克坦肆喜  
珠嘉塔克實布奉迎兩宮后御仁安殿出鉞金及七寶  
金洗分賜從行忠孝軍是夜兩宮及柔妃費摩氏等乘  
馬出宮行至陳留城左右火起疑有兵不敢進后亟命  
遷宮明日入京憩肆喜家少頃輦迎入宮方謀再行京  
城破后及諸妃嬪北遷不知所終惟寶符李氏從至宣  
德州居摩訶院李氏自入院止寢佛殿中作為幡旛會

當同后妃北行將發佛像前自縊死且自書門紙曰寶符御侍此處身故

宣宗明惠皇后王皇后之姊也生哀宗宣宗即位封為淑妃及妹立為后進封元妃哀宗即位詔尊為皇太后號其宮曰慈聖后性端嚴頗違古今哀宗已立為皇太子有過尚切責之及即位始免榎楚一日宮中就食尚器有玉盃楪三一奉太后二奉帝及中宮荆王母真妃龐氏以瑪瑙器進食后見之怒召主者責曰誰令汝妄

生分別荆王母豈卑我兒婦邪非飲食細故已令有司杖殺汝矣是後宮中奉真妃有加或告荆王謀不軌者下獄議已決帝言于后后曰汝止一兄柰何以讒言欲害之章宗殺伯與叔享年不永皇嗣又絕何為欲效之邪趣赦出使來見我移時不至吾不見汝矣帝起后立侍王至涕泣慰撫之哀宗甚寵一宮人欲立為后后惡其微賤固命出之上不得已命放之出宮語使者曰爾出東華門不計何人首遇者即賜之於是遇一販繒者

遂賜為妻點檢薩哈連教上駙鞠后傳旨責之云汝為人臣當輔主以正顧乃教之戲邪再有聞必大杖汝矣比年小捷國勢頗振文士有奏賦頌以聖德中興為言者后聞不悅曰帝年少氣銳無懼心則驕怠生今幸一勝何等中興而若輩諂之如是正大八年九月丙申后崩遺命園陵制度務從儉約十二月己未葬汴城迎朔門外五里莊獻太子墓之西謚明惠皇后

哀宗皇后圖克坦氏宣宗及后有疾后嘗剖膚以進宣

宗嘉歎之興定四年后父鎮南將節度使烏遜有罪宣宗以后純孝因曲赦之聽其致仕正大元年詔立為皇后哀宗遷歸德遣后弟肆喜等詣汴奉迎夜至陳留不敢進復歸于汴未幾城破北遷不知所終

贊曰周禮九殞掌婦學之法婦德婦言婦容婦功班昭氏論之曰婦德不必才明絕異也婦言不必便口利辭也婦容不必顏色美麗也婦功不必功巧過人也清閑貞靜守節整齊行已有恥動靜有法是謂婦德擇辭而



說不道惡語時然後言不厭於是謂婦言鹽澆塵穢  
服飾鮮潔沐浴以時身不垢辱是謂婦容專心紡績不  
好戲笑潔齊酒食以奉賓客是謂婦功後世婦學不脩  
麗色以相高巧言以相傾銜能以市恩逢迎以固寵是  
故悼平嬖損皇統以隕其身海陵蠱惑羣嬖幾亡其國  
道陵李氏擅寵蠹政卒傾其宗嗚呼可不戒哉

金史卷六十四

# 欽定四庫全書

史部

金史卷六十五  
七

詳校官國子監祭酒臣覺羅書喜

內閣中書臣李彤覆勘

總校官舉人臣章維桓

校對官主事臣金光悌

謄錄監生臣范沅

欽定四庫全書

金史卷六十五

元中書右丞相總裁托克托等修

列傳第三

始祖以下諸子

幹魯

博囉

錫赫特

孫巴達

錫哩布

子博諾

錫里庫

烏肯徹

伯赫

崇成

本名布呼

噶

順

子晉嘉努

滿

丕

子滿都布

們都

們圖琿

威泰

烏

色

子宗永

烏

哲

孫璋

昂

本名烏達  
子正嘉

始祖明懿皇后生德帝烏嚕季幹魯女曰卓克索巴皆

福壽之語也以六十後生子異之故皆以嘉名名之焉

德帝思皇后生安帝季曰博囉博囉與獻祖俱徙海古

勒水置屋宇焉博囉孫呼實呼實子和卓與景祖長子  
韓國公和卓同名韓國公前死所謂肅宗納和卓之妻  
瓜爾佳氏者是也穆宗四年伐阿蘇阿蘇走遼遼使  
使來止伐阿蘇軍穆宗陽受遼帝約束先歸國留和卓  
守阿蘇城凡三年卒攻破之天會十五年贈特進  
安帝節皇后生獻祖次曰信德次曰錫赫特次曰錫哩  
布次曰錫里庫

錫赫特之孫巴達錫哩布之子博諾皆佐世祖有功博

諾勇毅善射當時有與同名者嘗有二志目之曰惡博  
諾天會十五年巴達贈儀同三司博諾贈開府儀同三  
司在世祖時罕都伊克及和卓巴達博諾五人者不離  
左右親若手足元勲之最著者也明昌五年皆配饗世  
祖廟廷準塔蘇拉布皆瓜爾佳部人賽音諾延綽哈皆  
圖們部人富哲尼瑪哈完顏部人阿固岱布達皆音德  
爾水完顏部貝勒七人者當携離之際能一心竭力輔  
戴者也德濟呼遜皆珠嘉部貝勒雙寬主保皆珠格部

人阿固岱溫特赫部人此五人者又其次者也世祖初  
年伯赫為變烏春威強使人召阿固岱布達阿固岱曰  
吾不知其他死生與太師共之太師謂世祖也布達大  
喜曰我心正如此耳烏春兵來堅壁自守勿與戰可也  
德濟呼遜居博勒和水烏春兵出其間不為變終拒而  
不從雙寬居和博克村其兄卓巴納貝勒烏春止其  
家而以兵圍雙寬烏春辭去世祖殺卓巴納雙寬請無孥  
戮世祖從之世祖破和諾克薩克達主保死焉天會十



五年準塔賽音諾延阿固岱布達皆贈金紫光祿大夫  
蘇拉布綽哈富哲尼瑪哈德濟呼遜雙寬主保溫特赫  
阿固岱皆贈銀青光祿大夫又有和倫瓜爾佳部雙寬  
貝勒察遜水烏雅部富哲固納畏烏春彊請世祖出兵  
其間以為重世祖使色埒默雅爾盤將別軍過之固納  
教色埒默取先在烏春軍中二十二人烏春覺之殺二  
人得二十人固納又以土人益色埒默軍穆宗他日嘉  
此功不能忘以色埒默女守寧妻固納子呼爾罕馬摩

多圖水費摩部鄂博貝勒附於世祖和諾克焚之鄂博卒世祖厚撫其家因併錄之以見立國之艱難云

錫里庫者昭祖將定法制諸父國人不悅已執昭祖將殺之錫里庫亟往彎弓注矢射於衆中衆乃散去昭祖得免國俗有被殺者必使巫覡以詛祝殺之者迺繫刃于杖端與衆至其家歌而詛之曰取爾一角指天一角指地之牛無名之馬向之則華而背之則白尾橫視之則有左右翼者其聲哀切悽婉若萬里之音既而以刃

盡地劫取畜產財物而還其家一經詛祝家道輒敗及  
拉林水烏蘇展部殺完顏部人昭祖往烏蘇展部以國  
俗治之大有所獲頒之於諸父昆弟而不及錫里庫錫  
里庫曰前日免汝於死者吾之力往治烏蘇展部者吾  
之謀也分不及我何邪昭祖於是早起自齋間金列鞞往  
覷之時錫里庫猶未起撫寢衣而問曰爾為誰昭祖曰  
舒嚕先擇此寶而後頒及他人敢私布之錫里庫既揚  
言初不自安至是乃大喜列鞞者腰佩也

獻祖恭靖皇后生昭祖次曰巴圖次曰阿布哈次曰圖庫次曰都古魯訥次曰薩里罕次曰薩克蘇

昭祖威順皇后生景祖次曰烏肯徹次室達呼默烏蘇展部人生伯赫伯勒赫幹里延次室高麗人生和碩台烏肯徹初昭祖久無子有巫者能道神語甚驗乃往禱焉巫良久曰男子之寇至矣此子厚有福德子孫昌盛可拜而受之若生則名之曰烏古魯是為景祖又良久曰女子之寇至矣可名曰烏延又良久曰女子之兆復

見矣可名曰烏達布又久之復曰男子之兆復見然性不馴良長則殘忍無親親之恩必行非義不可受也昭祖方念後嗣未立乃曰雖不良亦願受之巫者曰當名之曰烏肯徹既而生二男二女其次第先後皆如巫者之言遂以巫所命名名之景祖初立烏肯徹酌酒屢悖威順皇后后曰巫言驗矣悖亂之人終不可留遂與景祖謀而殺之部人怒曰此子性如此在國俗當主父母之業奈何殺之欲殺景祖后乃遣景祖出謂衆曰為子

而悖其母率是而行將焉用之吾割愛而殺之烏古龍  
不知也汝輩寧殺我乎衆乃罷去烏肯徹之子希卜蘇  
自有傳

伯赫及同母弟二人自幼時每爭攘飲食昭祖見而惡  
之曰吾娶此妾而生子如此後必爲子孫之患世祖初  
立伯赫果有異志誘和諾克薩克達烏春烏木罕離間  
部屬使貳於世祖世祖加意事之使爲貝勒而不令典  
兵伯赫既陰與和諾克烏春謀計國人皆知之而童謠

有欲生則附於伯赫欲死則附於和哩布頗拉淑之語  
世祖亦以策探得兄弟部人向背烏春和諾克相次以  
兵來攻世祖外禦強兵內畏伯赫之變將行聞伯赫食  
於其愛妾之父家肉張咽而死且喜且悲乃迎尸而哭  
之

崇成本名布呼泰州司屬司人昭祖玄孫大定十八年  
收充奉職改東宮入殿實達爾轉護衛二十五年章宗  
為原王充本府祇候郎君明年上為皇太孫復為護衛

上即位授河間府判官以憂去職起復為宿直將軍累遷武衛軍都指揮使泰和三年卒贈贈有加崇成謹飭有守宿衛二十餘年未嘗有過故久侍密近云

景祖昭肅皇后生韓國公和卓次世祖次鄭國公噶順次肅宗次穆宗次室綽斯和契丹人生代國公赫色本次室溫特赫氏名都本生虞國公滿正隋國公鄂蘭哈瑪爾鄭國公們圖琿和卓鄂蘭哈瑪爾別有傳

噶順天會十四年大封宗宗噶順追封王爵正隆例降



封鄭國公子普嘉努又名昱嘗從太祖伐塔克烏塔太  
祖使普嘉努招卓多卓多即降康宗八年係遼籍女直  
赫舍哩部阿勒呼丹阻兵招納亡命邊民多亡歸之普  
嘉努以偏師夜行晝止抵實琿水襲擊大破之盡俘其  
孥而還邊氓自此無復亡者後與宗雄視秦州地土太  
祖因徙萬家屯田于其地天輔五年普嘉努為溫貝勒  
遂為都統使往襲遼帝而以雨潦不果行既而烏赫哩  
貝勒果都統內外諸軍以取中京普嘉努等皆為之副

遼帝西走都統果使普嘉努以兵一千助達蘭擊遼都  
統瑪格與達蘭不相及普嘉努與色哩舍音降其西北  
居延之衆而降民稍復逃散皮室部亦叛遂率兵龍衣之  
至德里川遇敵八千遂力戰兵敗察喇以兵來會追及  
敵兵于黃水獲畜產甚衆是役也鄂屯安塔哈被十一  
創竟敗敵兵而還軍于旺國崖西色哩亦以兵會太祖  
自草濼追遼帝普嘉努宗望為前鋒戒之曰彼若深溝  
高壘未可與戰即偵伺巡邏勿令遯去以俟大軍若其

無備便可擊也上次古爾珍川烏舍馬和尚至小魚灤  
夜潛入遼主營執斯勒年以還遂知遼帝所在普嘉努  
等晝夜兼行追及于石輦鐸我兵四千至者才千人遼  
兵圍之伊都指遼帝麾蓋騎兵馳之遼帝遯去兵遂潰  
所殺甚衆宗翰為西北西南兩路都統普嘉努幹魯為  
之副烏瑛部叛普嘉努討平之天會間為司空封王天  
眷二年宗磐等誅辭及普嘉努詔奪司空是年薨天德  
初配享太祖廟廷正隆二年例封豫國公

滿丕天會十五年封王正隆例封虞國公長子滿都布  
孝友恭謹多謀而善戰年十五隸軍中從攻鄂勒歡及  
係遼女直和碩台等為變滿都布自為質遂從和碩台  
歸中途以計殺守者而還攻寧江州取黃龍府破高永  
昌取春泰州皆有功多受賞賚遂為穆昆討嶺東未服  
州郡過土河東山敗賊三千人奚契丹寇土河西與明  
安蒙克瑪奇擊之滿都布對敵之中摧鋒力戰破其衆  
九萬人奚衆萬餘保阿林甸復擊敗之降其旁近居人

復以五百騎破遼兵一千生擒其將以歸與棟摩攻興  
中府中流矢卒年三十七天眷中贈金紫光祿大夫謚  
英毅

們圖琿屢從征伐天會二年為阿斯罕貝勒參議國政  
明年薨天會十五年大封宗室追封王正隆創封鄭國  
公明昌五年謚定濟

們都襲父滿丕明安們都卒子素赫襲素赫卒子薩哈  
連襲薩哈連卒子惟銘襲惟銘本名默呼字子鑄駢脅

多力喜周給人至寧初守楊文關有功兼都統護漕運  
貞祐二年佩金牌護親軍家屬遷汴遙授同知祁州軍  
州事充提控貞祐三年破紅襖賊於大沫堦惟銘入自  
北門諸軍繼進生獲劉二祖功最遷泰安軍節度副使  
改遂王府尉都水少監東平府治中坐誤以办傷同知  
府事赫舍哩約赫德當削降殿年仍從軍自効討花帽  
賊于曹濟間行省蒙古綱奏其功復前職遷邳州經畧  
使卒子從傑襲明安累功遙授鎮南軍節度副使

世祖翼簡皇后生康宗次太祖次魏王威泰次太宗次  
遼王舍音次室圖克坦氏生衛王烏色次魯王烏哲次  
室布薩氏生漢王阿庫納次室珠格氏生魯王棟摩次  
室珠格氏生沂王扎拉次室烏庫哩氏生鄆王昂

威泰年二十餘薩哈伐塔克威泰與希卜蘇阿里罕等  
俱為裨將諸將議攻取威泰獨主攻城便太祖將至軍  
威泰迎之謂太祖曰塔克城且下勿惑他議太祖從之  
至軍中衆議乃決威泰急起治攻具其夜進兵攻城遲

明破之及二額訥斯琿路二思楚路寇盜威泰盡平之  
康宗二年甲申蘇伯水諸部不聽命康宗使威泰等往  
治其事行次呼爾哈川薩哈村召諸部皆至惟鴻觀部  
沃赫貝勒不至威準部達薩塔貝勒哲爾德部薩克蘇  
貝勒亦皆遯去遇烏塔於瑪奇嶺烏塔遂執二人以降  
於是使威泰將兵代沃赫募軍于蘇伯水沃赫完聚固  
守攻而拔之進師博齊赫布騰路攻拔歡塔城取畔者  
以歸太祖於母弟中最愛威泰威泰歸自歡塔城太祖



以事如寧江州欲與威泰偕行威泰曰兵役久勞未及  
息也遂不果行太祖還晝寐于拉林水傍夢威泰之場  
圍火未盡焚不可撲滅覺而深念之以為憂是時威泰  
已寢疾太祖至聞之過家門不下馬徑至威泰所問疾  
未幾薨年三十四太祖每哭之慟謂人曰予強與之偕  
行未必死也威泰剛毅果斷服用整肅臨戰決策有世  
祖風世祖之世軍旅之事多專任之太祖平遼歎曰恨  
威泰之不及見也天會十五年追封儀同三司魏王謚

曰定肅

烏色穆宗初威準部族相鈔畧遣訥格納貝勒以其兵  
往治訥格納擅募蘇伯水人為兵不聽輒攻畧之其人  
來告穆宗使烏色及伊克往問狀訥格納雖伏而不肯  
償所取因遜去伊克等皆不欲追烏色督軍而進至巴  
固嶺西茂密水及之大破其衆訥格納死焉烏色撫定  
蘇伯水民部執訥格納之母及其妻子而歸穆宗曰烏  
色年尚幼巴能集事可嘉也康宗二年甲申威泰治蘇

伯水諸部烏色幹魯佐之定諸部而還久之高麗殺行人阿古雙寬而築九城於海蘭甸烏色將內外兵海古勒和尼齊富察都古嚕訥佐之高麗兵數萬來拒烏色分兵為十隊更出迭入大破之烏色母呼紐疾篤召還以幹魯代之未幾烏色復至軍再破高麗軍進圍其城七月高麗請和盡歸前後亡命及所侵故地退九城之戍遂與之和皇統五年追封衛國王

宗永本名塔塔烏色子長身美髯忠確勇毅天眷初以

宗室子預誅宗磐擢寧遠大將軍皇統初克牌印祇候  
五年出為趙州刺史秋滿再任轉興平軍節度使改大  
名尹貞元三年復為興平軍節度使歷昭德軍臨洮鳳  
翔尹大定二年入為工部尚書與蘇保衡完顏額哩頁  
遷加伐宋士官賞宗永性滯不習事凡與土賊戰者一  
槩加之世宗久乃知之謂宰相曰若一槩追還必生怨  
望若因循不問則爵賞濫矣其與土賊戰者有能以寡  
敵衆一人敵三十人以上者依已遷為定改同簽大宗

正事震武軍節度使卒

烏哲天會十五年大封宗室追封魯王正隆例改封公  
子實圖美驃騎衛上將軍子璋本名呼密多勇畧能通  
女直契丹漢字年十八左副元帥薩里罕引在麾下以  
事如京師見梁王宗弼與語宗弼悅之皇統六年父實  
圖美卒宗弼奏璋可襲穆昆詔從之天德三年充牌印  
祇候以罪免奪其穆昆寓居中都海陵伐宋左衛將軍  
富察薩勒扎同知中都留守佩金牌掌留府事世宗即

位于遼陽璋勸薩勒札歸世宗薩勒札不從璋與守城  
軍官烏凌阿實嘉努烏凌阿愿圖克坦三勝富察芬徹  
等以兵晨入留守府殺薩勒札及判官瑪延薩里罕推  
宗強子阿蘇為留守璋行同知留守事遺實嘉努佩薩  
勒札金牌與愿芬徹中都轉運使左淵子貽慶大興少  
尹李天吉子磐奉表如東京賀即位世宗嘉之以愿芬  
徹為武義將軍充護衛貽慶賜及第授從仕郎磐充閣  
門祇候就以璋為同知中都事璋以殺薩勒札自攝同

知留守世宗因而投之心常不自安遂與兵部尚書克  
實謀因世宗謁山陵作亂大定二年上謁山陵璋等九  
人會于克實家說萬戶高松不從璋知事不成乃與克  
實共執鄂倫詣有司陳上誅克實李惟忠等以璋為彰  
化軍節度使宋將吳璘出散關據寶雞以西詔璋赴元  
帥都監圖克坦喀齊喀軍前任使宋人據原州寧州刺  
史延扎們都以兵四千攻之不克宋將姚良輔以兵十  
萬至原州權副統完顏實訥埒以千騎援們都兵而姚

良輔兵多諸將皆不敢與戰及璋至軍會平涼涇州潘  
原長武等戍兵合二萬人乃使押軍明安舒穆魯錫喇  
布以兵二千軍於城北實訥塔以兵三千軍於城西北  
十里麥子原皆據高阜為陣璋以本部兵陣於城西姚  
良輔出自北嶺先遣萬人攻錫喇布而自以軍九萬陣  
麥子原下捍以劔盾行馬外列騎士步卒居其中敢死  
士鎖足行馬間持大力為拒分為八陣而別以騎二千  
襲璋軍璋方出迎戰實訥塔來報曰宋之重兵皆在麥



子原矣璋遣萬戶特哩實克烏頁以押軍明安奚慶喜  
昭蘇兵二千援錫喇布遣薩固察崔尹以兵二千益實  
訥埒錫喇布與宋人接戰良久敗之時宋兵在麥子原  
者最堅實訥埒與伊喇補鄂屯薩固察崔尹布格薩奇  
珠以兵五千沿壕為伏餘兵皆捨馬步戰擊其前行騎  
士走之於是行馬以前衝以長槍行馬以後射以勁弓  
良輔兵稍挫實訥埒乘勝麾兵撤其行馬破其七陣良  
輔復整兵出實訥埒少却而璋已破城下宋兵與實訥

瑒會使布格以伏兵擊良輔實訥瑒亦整兵與戰奮擊  
之大破良輔軍斬首萬餘級墜壕死者不可勝數鎖足  
行馬者盡殪之獲甲矢萬餘器仗稱是良輔亦中兩創  
脫去遂圍原州穴其西城城圯宋人宵遁瑒等入原州  
宋戍軍在寶雞以西聞之自散關遁去京兆尹烏雅富  
瑒赫寧州刺史持嘉烏蘇瑒克已去德順州宋吳璘復  
據之都監喀齊喀以瑒權都統與實訥瑒將兵二萬救  
德順瑒率騎兵前行與璘騎兵二萬戰于張義堡遂沙

山下敗之追北四十餘里璘軍過隘不得前斬首數十級璋至德順璘據城北險要為營璋亦策營與璘相望可三里許兩軍遇於城東凡五接戰璘軍敗走璋追至城下璘軍已據城北岡阜與其城上兵相應以弩夾射璋軍璋軍佯却城中兵來追璋反旆與戰大敗之喀齊喀遣統軍都監聶赫以兵七千來會與璘軍復戰敗之璘遣兵據東山堡欲樹柵璋與實訥琦聶赫議曰敵若據東山堡此城亦不可拔宜急擊之於是璋先據要地

實訥瑋以兵逼東山堡璘兵恃濠相拒短兵接璘兵退走實訥瑋進擊之璘城北營兵可六千人登北岡來戰瑋之漢軍少却傷者二百人璘遂焚瑋軍攻城具瑋率伊喇補明安兵踰北岡擊走之璘軍隔小壑射瑋軍伊喇補少却實訥瑋望見北原火發乃止攻東山堡亟與將士來赴引善射者先登率劉安漢軍三百人擊敗之璘軍皆走險璘以軍三萬據險作三陣皆環以劔盾行馬瑋遣萬戶舒穆魯迪里由別路自後擊之特哩實克

烏頁伊喇補以二千人當其前射以強弓璘兵大敗狼  
藉墮溝壑璋軍度澗追斬數千級而還璘軍雖敗猶恃  
衆都監喀齊喀使武威軍副總管瓜爾佳扎拉來問策  
諸將皆曰吳璘恃險不善野戰我退軍平涼彼必棄險  
就平地然後可圖也璋曰不然彼恃其衆非恃險也  
昔人有言寧棄千軍不棄寸地故退兵不如濟師我退  
軍平涼彼軍深入吾地固壘以拒我則如之何扎拉還  
報喀齊喀乃親率四萬人赴之吳璘詰旦乘陰霧晦冥

分兵四道來襲戰于城東離而復合者數四漢軍千戶  
李展率麾下兵先登奮擊之璘軍陣動璋乘勝踵擊璘  
軍復敗追至北岡璘走險急擊之殺畧殆盡璘分半軍  
守秦州喀齊喀駐軍水洛城東自六盤山至石山頭分  
兵守之斷其餉道璘乃引歸宋經畧使荆臯以步騎三  
萬自德順西去璋以兵八千實訥埒以兵五千追擊之  
實訥埒兵乃出其前還自赤崙遇其前鋒敗之于高赤  
崖下復與其中軍戰自日昃至暮乃罷荆臯乘夜來襲

營為退軍八十里明日實訥埒追之璋兵至上八節宋  
兵據險為陣璋捨馬步戰地險不得接相拒至曙宋兵  
動璋乘之追至甘谷城實訥埒兵亦至宋兵宵遯璋遂  
班師實訥埒追至伏羌城不及而還上使御史中丞德  
濟視諸軍功狀德濟舊與璋有隙故損其功詔璋將士  
賞此諸軍半之璋兼陝西路都統進官一階及元帥府  
上功璋居多詔德濟削官兩階杖八十解職上復賞璋  
及將士如諸軍以璋為西北路招討使召為元帥左都

監兼安武軍節度使賜以弓矢衣帶佩刀改益都尹左都監如故宋人棄海州遷去焚官民廬舍且盡璋至海州得所棄糧三萬六千餘石安集其人復其屯戍五年宋人約和罷三路都統復置陝西路統軍司以璋為使上曰監軍喀齊喀年老故授卿此職邊境無事且名卿矣以本官兼京兆尹召為御史大夫璋奏竊觀文武百官有相為朋黨者今在臺自臣外無女直人乞不限資考量材奏擬上曰朋黨為誰即糾治之朕選女直人未



得其人豈以資考為限論其人材而已頃之璋奏曰太祖武元皇帝受天明命太宗皇帝奄定宋土自古帝王之興必稱受命當製大金受命之寶以明示萬世上曰卿言正合朕意乃遣使夏國市玉十八年受命寶成奏告天地宗廟社稷上御正殿改大興尹為賀宋正旦使十三年璋受命使宋既行上遣人馳諭璋曰宋人若不遵舊禮慎勿付書如不令卿等入見即持書歸若迫而取之亦勿赴宴其回書及禮物一切勿受璋至臨安宋

人請以太子接書不從宋人就館迫取書璋與之且赴宴多受禮物有司以聞上怒欲寘之極刑左丞相良弼奏曰璋為將大破宋軍宋人讐之久矣將因此陷之死地未可知也今若殺璋或者墮其計中耳上以為然乃杖璋百五十除名副使客省使高翊杖百沒入其所受禮物後歲餘上念璋有征伐功起為景州刺史遷武定軍節度使授山東西路博迪山納古爾河穆昆改臨洮尹十九年卒

鄆王昂本名烏達世祖最幼子也常從太祖征伐天輔六年命昂與素赫以兵四千監護諸部降人處之嶺東就以兵守臨潢府昂不能撫御降人苦之多叛亡者上聞之使綽里特戒諭昂已過上京諸部皆叛去惟章愍宮小室韋二部達內地詔安班貝勒烏奇邁曰比達昂監徙諸部多致怨叛素赫駐兵不與討襲致使降人復歸遼主違命失衆當寘重法若有所疑則禁錮之俟師還定議是時太宗居守希卜蘇副之希卜蘇勸太宗因

國慶可薄其罰於是杖昂七十拘之泰州而殺素赫天  
會六年權元帥左都監十五年為西京留守天眷三年  
為平章政事皇統元年封漆水郡王二年制詔昂署銜  
帶皇叔祖字封郾王是歲薨子正嘉鶴壽鶴壽累官伊  
囉幹羣牧使死于契丹薩巴之難語在忠義傳

正嘉皇統初以宗室子授定遠大將軍除磁州刺史天  
德間為右諫議大夫累遷會寧尹安化軍節度使改益  
都尹海陵伐家為浙東道副統制與工部尚書蘇保衡

以舟師自海道趨臨安至松林島阻風泊島間詔旦舟人望見敵舟請為備正嘉間去此幾何舟人曰以水路測之且三百里風迅行即至矣正嘉不曉海路舟楫不之信有頃敵果至見我軍無備即以火砲擲之正嘉顧見左右舟中皆火發度不得脫赴水死時年四十一